

Visoki predstavnik se u Briselu sastao sa komesarom Frattinijem i komesarom Rehnom

Visoki predstavnik i specijalni predstavnik Evropske unije Christian Schwarz-Schilling danas se u Briselu sastao sa komesarom Francom Frattinijem i komesarom Olli Rehnom.

Gospodin Frattini je potpredsjednik Evropske komisije i komesar nadležan za pitanja pravosuđa, slobode i sigurnosti. Gospodin Rehn je evropski komesar za proširenje EU.

Christian Schwarz-Schilling je objasnio značaj odluke Vijeća za implementaciju mira o zatvaranju Ureda visokog predstavnika, najavljenom za 30. juli 2007. godine. Visoki predstavnik je takođe apelirao na komesare da u okviru njihovih mogućnosti poduzmu sve aktivnosti kako bi Evropska unija iskoristila priliku koju pruža zatvaranje Ureda visokog predstavnika i osigurala evropsku budućnost za Bosnu i Hercegovinu i regiju zapadnog Balkana.

Tokom sastanka s komesarom Frattinijem, visoki predstavnik i specijalni predstavnik Evropske unije je lobirao za izmjene viznog režima zemalja Evropske unije prema državljanima BiH, iznoseći argument da vizni režim treba biti pojednostavljen za pojedine kategorije građana, uključujući poslovne ljude, studente i osobe koje se bave naučnoistraživačkim radom, što bi bio prvi korak ka ublažavanju viznog režima za sve kategorije građana BiH.

Christian Schwarz-Schilling je sistematski lobirao za ublažavanje viznog režima za građane BiH i na sastancima s ministrima unutrašnjih poslova EU, održanim tokom proteklih nekoliko mjeseci, uključujući i sastanak s Wolfgangom

Schaeubleom, njemačkim ministrom unutrašnjih poslova i bivšim kolegom visokog predstavnika iz njemačke vlade.

«Ublažavanje viznog režima je izuzetno važno», rekao je Christian Schwarz-Schilling. «To bi osiguralo konkretne rezultate za bh. građane te bi pomoglo u ostvarivanju daljnog napretka BiH ka euroatlanskim integracijama».

Komesar Frattini je podržao argumente koje je prezentirao visoki predstavnik i izjavio da će prije sezone godišnjih odmora ministrima pravde i unutrašnjih poslova EU prezentirati svoje prijedloge za dodjeljivanje pregovaračkog mandata za ova pitanja.

Visoki predstavnik se stavio na raspolaganje i ponudio da posjeti glavne gradove u kojima postoji skepticizam u pogledu ublažavanja viznog režima EU, kako bi i nastavio lobirati za Bosnu i Hercegovinu.

Christian Schwarz-Schilling je dvodnevnoj posjeti Briselu. Sutra će se obratiti Komisiji za politička i sigurnosna pitanja Vijeća EU.